

Hvala Allahu, Gospodaru svjetova! Salavat i selam neka je na Allahova poslanika, Muhammeda, s.a.v.s., njegovu porodicu, ashabe i sve one koji ga slijede na putu islama!

Poštovana braćo i sestre, draga djeco i omladino, esselamu alejkum!

Nalazimo se, u prvom petku mubarek mjeseca ramazana koji je poznat i kao mjesec darežljivosti. Naravno, to ne znači da u drugim mjesecima nema darežljivosti, ali je ona u ramazanu, ipak, još više izražena. Mi to dokazujemo svake godine dajući zekat, sadekatul-fitr, dobrovoljne priloge i pomaganjem potrebitih.

Zašto je darežljivost u ramazanu posebno izražena? Jedan od glavnih razloga svakako je i taj što Uzvišeni Allah tijekom ramazana vezuje šejtane i oni ne mogu da vjernike odvrćaju od činjenja dobrih dijela i darežljivosti u onoj mjeri kao što to čine van ramazana.

Uzvišeni Allah nas upozorava čime nas šejtan prepada i kaže: „**Šejtan vas plaši neimaštinom i navraća vas da budete škrti, a Allah vam obećava oprost i nagradu Svoju; Allah je neizmjereno dobar i sve zna!**“ (El-Bekare, 268)

Dakle, naša darežljivost u ovom mjesecu je posebno izražena. Pa, čak, i oni što su inače manje darežljivi i koji ova navedena davanja smatraju nametom, ipak drže svoju ruku otvorenom.

Uzvišeni Allah nas potiče na darežljivost govoreći: „**Imetak koji udijelite drugima u vašu je korist. Ono što udijelite drugima neka bude samo Allahu za ljubav. A ono što od imetka udijelite drugima bit će vam u potpunosti nadoknađeno i neće vam nepravda biti učinjena.**“ (El-Bekare, 272)

Tim svojim postupcima u mjesecu ramazanu, mi se, ustvari, ugledamo na našeg Poslanika, s.a.v.s., koji je u ovom mjesecu, u kome se sadaka najbolje nagrađuje, bio najdarežljiviji. Naravno, on je bio darežljiv i u drugim mjesecima, što potvrđuje i predaja da Poslanik, s.a.v.s., nikada nikog nije odbio, tko mu je pomoć zatražio. Čak bi se u tu svrhu znao i zadužiti.

Jedan od najljepših primjera njegove darežljivosti jeste slučaj kada je zaklao jednu ovcu, a potom naredio Aiši, r.anha, da ode da je podijeli. Pa kada se ona vratila, on je upita da li šta ostalo od ovce, a ona odgovori: „*Ostala je samo plećka!*“ Poslanik, s.a.v.s., tada reče: „**Ostalo je sve osim plećke!**“ (Muslim)

U drugom hadisu, Poslanik, s.a.v.s., kaže: „**Nema dana u kojem osvanu robovi, a da dva meleka ne siđu, pa jedan kaže: 'Allahu, nadoknadi onome koji dijeli!' A drugi kaže: 'Allahu, uništi škrticu!**“ (Buharija i Muslim)

Siguran sam da se je većina nas uvjerila u navedene Poslanikovih, s.a.v.s., riječi, kao i prethodno navedeno Allahovog, dž.š., obećanje, odnosno, da

nam se višestruko vraćalo ono što smo udijelili, a da nam je propadalo ono što nam je bilo žao da damo.

Takva je situacija i sa onim što je sada posebno aktuelno, a to je organiziranje i pripremanje iftara. S tim u vezi Poslanik, s.a.v.s., kaže: „**Ramazan je mjesec potpomaganja i suosjećanja. Mjesec u kome se povećava nafaka vjerniku. Onaj tko nahrani postača, bit će mu oprošteni grijesi, bit će zaštićen od vatre, a imat će nagradu kao i onaj tko je postio a da se onome ništa ne umanji.**“ **Ashabi upitaše: "A šta ako neko od nas nema čime nahraniti drugog?" On odgovori: „Ove iste sevabe kod Allaha će imati onaj tko dadne postaču hurmu, gutljaj vode ili mlijeka, a tko zasiti postača, Allah će ga napojiti sa moga izvora, od kojeg neće ožednjati sve do ulaska u Džennet.**“ (Ibnun-Nedždžar)

Prenosi se da je neki islamski učenjak šetao sa jednim od svojih učenika i kad su naišli pored jednog polja ugledali su stare cipele koje su pripadale siromašnom zemljoradniku koji je radio u polju. Ugledavši stare cipele, učenim mu reče: „*Učitelju, šta misliš da se malo našalimo sa ovim siromahom i da mu sakrijemo cipele, pa da odemo iza obližnjeg stabla i sačekamo da vidimo kako će se ponašati kad ne bude našao cipele tamo gdje ih je ostavio?*“

Mudri učenjak mu odgovori: „*Vjernik ne smije sebi dozvoliti da traži veselje i razonodu u rastuživanju drugih ljudi. Sinko moj, pošto ti dolaziš iz bogate*

porodice, šta misliš da u obje cipele ovog siromaha staviš određenu svotu novca, pa da vidimo kako će se siromah ponašati kada nađe novac u svojim starim cipelama?!”

Učenik je bio zadivljen učenjakovim prijedlogom i odmah je stavio po nekoliko novčanica u obje cipele, a zatim su njih dvojica otišli iza obližnjeg stabla da čekaju siromaha.

Nekoliko minuta kasnije, nakon što je završio posao u njivi, došao je siromah da obuče cipele i da ide kući. Međutim, kad je stavio desnu nogu u cipelu osjetio je da nešto ima u njoj. Skinuo je cipelu i u njoj našao nekoliko novčanica. Onda je isto to učinio i sa drugom cipelom i u njoj je također pronašao novac. Pažljivo je pregledao novčanice više puta kako bi bio siguran da ne sanja. Onda je razgledao oko sebe ne bi li ugledao onoga tko je stavio novac u njegove cipele. Pošto nije nikoga vidio, stavio je novac u džep, a zatim je pao na koljena i pogledom uprtim u nebo, sa suzama u očima, glasno je zahvaljivao Allahu, govoreći: *”Zahvaljujem Ti, Allahu dragi, Tebi Koji znaš da je moja žena teško bolesna i da su moja djeca ostala gladna kod kuće, Tebi Koji si spasio moju djecu i moju porodicu od uništenja!”* I dugo je plakao zagledan u nebo, zahvaljujući Allahu, dž.š., na Njegovoj dobroti i plemenitosti.

Taj prizor ganuo je učenika do suza. Vidjevši suze u njegovim očima, učenjak ga je upitao: *”Nisi li sad sretniji nego da smo sproveli u djelo tvoj prvi prijedlog?”* Učenik je odgovorio: *’Danas sam naučio lekciju koju neću nikada zaboraviti. Tek sad sam shvatio značenje riječi koje nisam ispravno razumio tokom cijelog mog života: ’Mnogo je veća sreća u davanju nego u uzimanju.’“*

Na to mu je učenjak rekao: *”Sinko moj, znaj da postoji mnogo vrsta davanja: opraštanje kad si u mogućnosti da kazniš, je davanje; dova za odsutnog brata muslimana, je davanje; prihvaćanje isprike i ostavljanje lošeg mišljenja o muslimanima, je davanje, sustežanje od napada na čast muslimana, je davanje.*

Braćo i sestre! Znajmo da naš Gospodar, Uzvišeni Allah, sigurno nikome neće ostati dužan! Zato molimo Uzvišenog Allaha da nam oprostí naše grijehé, ujedini naša srca i obaspe nas Milošću u ovoj prvoj trećini ramazana, u periodu Njegovog Rahmeta.

Amin!

Prethodne hutbe potražite na našoj stranici: [www.medzlis-split.org](http://www.medzlis-split.org)

Pripremio: Vahid ef. Hadžić

Split, 02.6.2017.

ISLAMSKA ZAJEDNICA U HRVATSKOJ  
MEDŽLIS ISLAMSKE ZAJEDNICE SPLIT

MJESEC  
DAREŽLJIVOSTI

480